

**ANALIZA TRANSPARENTNOSTI  
SUDOVA U BOSNI I HERCEGOVINI**

**Sarajevo, april 2016.**

Strukturalnim dijalogom o pravosuđu između Evropske unije i Bosne i Hercegovine, aktuelizirana je politička rasprava o budućnosti Suda Bosne i Hercegovine, odnosno njegovim budućim nadležnostima iz krivične oblasti. Prebacivanjem težišta postizanja kompromisa na političku ravan unutar dijametralno suprotstavljenih tabora, zapostavljena su neka od krucijalnih profesionalnih pitanja pravosudne struke. Za obične građane, kojima nije toliko bitno pred kojom sudskom instancom će tražiti ili braniti svoje interese, mnogo je značajnije da imaju povjerenje u postojeći pravosudni sistem. Međutim, prema svim relevantnim istraživanjima koja su provedena proteklih godina u Bosni i Hercegovini, svjedočimo da je to povjerenje na veoma niskom nivou. Stoga, u fokusu unapređenja stanja u ovoj oblasti, ali i strukturalnog dijaloga o pravosuđu, u prvom planu trebaju biti pitanja kako postići odgovarajući nivo efikasnosti pravosuđa uz neophodnu nepristrasnost, nezavisnost i profesionalnost, kao osnovnih pokazatelja o kvalitetu provedenih reformi.

U tom kontekstu, opravdano se postavlja pitanje kako će građani formirati svoje mišljenje i stav o tome koja politička opcija najbolje zastupa njihove interese u ovom dominantno političkom nadmetanju oko budućih nadležnosti Suda BiH. Da li su sudovi na ostalim nivoima vlasti u ovom trenutku dovoljno osposobljeni da potpuno preuzmu breme profesionalnog i objektivnog procesuiranja svih djela iz krivične oblasti? Jedan od bitnih pokazatelja osposobljenosti i kapaciteta sudova odnosi se svakako i na javnu dostupnost informacija o njihovom radu. Kao skromni doprinos aktuelnoj raspravi od strane civilnog društva koje je, da napomenemo, naprasno i neprimjerno isključeno iz aktuelnog procesa strukturalnog dijaloga o pravosuđu, izvršili smo analizu dostupnosti informacija o radu pojedinih sudova u BiH. Vjerujemo da će ove informacije upotpuniti sliku o tome koliko su određeni sudovi spremni za predstojeće izazove, odnosno koliko polažu računa o prezentaciji i dostupnosti svoga stručnog rada široj javnosti.

Za potrebe ove analize sagledali smo dostupnost informacija vezanih za godišnje izvještaje o radu sudova, procesuirane predmete, mogućnost razgledanja sudskih spisa, njihovom osoblju, te informacije o aktuelnostima u njihovom radu. Analizirana je dostupnost takvih informacija za 19 sudova u BiH uvidom u sadržaj njihovih zvaničnih internet stranica.<sup>1</sup>

---

<sup>1</sup>Analizirani su: Vrhovni sud FBiH, 10 kantonalnih sudova u FBiH, Vrhovni sud Republike Srpske, 5 okružnih sudova u Republici Srpskoj, Osnovni i Apelacioni sud u Brčko Distriktu BiH. Pristupanje informacijama se vršilo preko internet portala [www.pravosudje.ba](http://www.pravosudje.ba) na kojoj su predstavljeni svi navedeni sudovi.

Uspostavljeni Portal pravosuđa Bosne i Hercegovine od strane Visokog sudskog i tužilačkog vijeća BiH ([www.pravosudje.ba](http://www.pravosudje.ba)), predstavlja izvor opštih informacija o radu svih pravosudnih institucija u BiH, te putem linkova omogućava pristup svim pravosudnim instancama na različitim nivoima. Sličnu praksu nalazimo i u zemljama okruženja, tako da ovaj vid prezentacije svakako predstavlja iskorak i konkretan rezultat dosadašnjih reformi u okviru sektora pravosuđa. Međutim, detaljnija analiza dostupnih materijala samih sudova pruža malo drugačiju sliku.

Kada se sagledaju dostupne **informacije o radu sudova**, analiza je pokazala da bi sudovi trebali biti značajno transparentniji i ažurniji u objavljivanju godišnjih informacija o svom radu na njihovim zvaničnim internet stranicama. To naročito važi za Kantonalni sud u Sarajevu, na čijoj stranici se ne može naći niti jedan godišnji izvještaj o radu. Na drugoj strani, pozitivan primjer predstavljaju Vrhovni sud Republike Srpske, Okružni sud u Trebinju i Kantonalni sud u Livnu, koji su učinili dostupnim najviše godišnjih izvještaja o svom radu.

Istina, na stranici Visokog sudskog i tužilačkog vijeća BiH regularno su dostupni godišnji izvještaji o radu svih sudova u BiH, ali su u njima iskazani samo zbirni podaci. Obaveza koja se navodi u izvještajima je da svaki sud objavi svoje izvještaje o radu na svojoj vlastitoj stranici, ali u praksi vidimo da se ona u velikoj mjeri ne provodi.

U kontekstu dostupnosti **informacija o predmetima**, referentnu tačku predstavlja Sud Bosne i Hercegovine na čijoj zvaničnoj internet stranici postoji mogućnost uvida u informacije po sljedećim kategorijama: optuženi po broju predmeta, pravosnažno okončani predmeti i presude. Takav centraliziran i jednostavan prikaz predmeta nije dostupan na zvaničnim stranicama ostalih sudova koji su bili predmet istraživanja. Istina, određene informacije o završenim predmetima, odnosno prvostepenim i pravosnažno završenim predmetima se mogu pronaći na stranicama sudova. Na osnovu ostvarenog uvida u dostupne informacije u vremenskom periodu 2014. – 2015. godine, može se konstatovati da:

- 1) pojedini sudovi objavljuju presude pod kategorijom „aktuelnosti“;
- 2) postoji izrazita nesrazmjernost između riješenih i objavljenih predmeta u istraživanom periodu; i
- 3) objavljuju se presude iz krivičnog referata.

Ipak, kao što je navedeno jedino stranica Suda Bosne i Hercegovine omogućava javnosti sveobuhvatan pristup svim predmetima koji su predmet njihovog rada.

Bitno je napomenuti da je na Portalu pravosuđa BiH, kao i na web stranicama istraživanih sudova, dostupna mogućnost uvida u predmete putem Interneta. Međutim, radi se o servisu koji omogućava samo strankama u postupku i njihovim advokatima da ostvare uvid u različite segmente vlastitih sudskih predmeta koji se vode pred određenim sudovima. Za korištenje servisa neophodno je prethodno dobiti Jedinostveni pristupni kod (JPK) od nadležnog suda.<sup>2</sup>

U pogledu **razgledanja sudskih spisa**, javnost, odnosno zainteresovani građani, samo na pojedinim sudovima u Federaciji BiH mogu ostvariti uvid u spise koji se nalaze u nadležnosti suda u skladu sa odredbama Zakona o slobodi pristupa informacijama i Pravilnika o unutrašnjem sudskom poslovanju.<sup>3</sup> Nasuprot tome, ova mogućnost na sudovima u Republici Srpskoj i Distriktu Brčko je ograničena samo na stranke u postupku i njihovim opunomoćnicima.<sup>4</sup> Analiza informacija koje su dostupne na zvaničnim stranicama sudova, ukazuje na različitost tumačenja postojećih propisa i određenu diskriminaciju građanskih prava u odnosu na mjesto i prostor gdje pokušavate ostvariti ta prava.

**Ažuriranost rubrike „aktuelnosti“** varira među sudovima. Kriterij vrednovanja po definisanoj metodologiji predstavljao je objavljivanje 10 vijesti na godišnjem nivou. Na osnovu ovih parametara pozitivan primjer predstavlja Kantonalni sud u Novom Travniku koji, u prosjeku, objavljuje 71.1 vijest na godišnjem nivou. Tu se mogu svrstati i Okružni sud u Doboju, koji godišnje objavljuje 40 vijesti u prosjeku, te Vrhovni sud Federacije BiH čiji prosjek iznosi 39.7. Negativan primjer predstavlja Kantonalni sud u Sarajevu koji, za period od 11.12.2009. – 13.04.2015., ima svega devet saopštenja, te Kantonalni sud u Mostaru koji je od 2014. godine do početka februara 2016.godine objavio samo 4 vijesti.

Generalno gledajući, u okviru te rubrike se mogu naći informacije o toku aktuelnih suđenja i presudama, informacije o izmjenama zakona, te ostalim javnim događajima u kojima su

---

<sup>2</sup> Međutim, ovaj servis ima i određena ograničenja. Putem servisa je onemogućen pristup krivičnim predmetima i predmetima sa ograničenim pristupom. Za više informacija vidjeti: “UPUTSTVO – Pristup sudskim predmetima putem Interneta”, dostupno na

<http://pravosudje.ba/vstv/faces/kategorijevijesti.jsp?ins=10001&modul=7694&kat=7703>

<sup>3</sup> Radi se o Vrhovnom sudu Federacije Bosne i Hercegovine, te kantonalnim sudovima u Goraždu, Mostaru, Novom Travniku i Zenici.

<sup>4</sup> Međutim, kod nekih sudova to pravo je prošireno, ali poprilično nedorečeno. Tako npr. na Okružnom sudu u Istočnom Sarajevu pravo na razgledanje spisa imaju i „ostale osobe koje imaju opravdan interes“. Slično je i na Osnovnom sudu Brčko Distrikta BiH, gdje, osim stranaka u postupku i njihovih punomoćnika, pravo na razgledanje spisa imaju i „stranke koje imaju jasan pravni interes“.

sudjelovali uposlenici suda ili su bitni za informisanje građana i sl. Osim toga, neki od sudova koriste ovu rubriku za objavljivanje parcijalnih ili cjelokupnih izvještaja o svom radu.<sup>5</sup>

Što se tiče dostupnih **informacija o osoblju i uposlenicima**, svi posmatrani sudovi nude potpune podatke o svojim uposlenicima, tj. o sudijama, dodatnim sudijama (ukoliko ih ima), stručnim saradnicima (ukoliko ih ima), te administrativno-tehničkom osoblju. Ažurnost navedenih podataka nije bilo moguće provjeriti u obuhvatu ovoga predmeta istraživanja.

Generalna slika koja se može steći nakon uvida u Internet transparentnost pojedinih sudova u BiH je da su evidentni određeni pomaci u približavanju rada sudova široj javnosti, ali da svakako postoji nepobitna potreba za unapređenjem rada u ovoj oblasti. Samo se kvalitetno informisano društvo može realno odrediti o vrednovanju rada sudova, te samim tim i osnažiti povjerenje građana u rad sudskih instanci, koje je dobro narušeno. Ujednačavanje prakse i jednoobrazan sistem informacija koji će biti na raspolaganju građanima svakako je jedna od tema kojoj se mora posvetiti adekvatna pažnja i unutar strukturalnog dijaloga o pravosuđu između Evropske unije i Bosne i Hercegovine.

U prilogu se nalazi tabelarni prikaz podataka o dostupnosti pojedinih informacija, uz napomenu da je istraživanje obuhvatilo period zaključno sa 1. aprilom 2016. godine. .

---

<sup>5</sup>Inače, na internet stranici Suda BiH ([www.sudbih.gov.ba](http://www.sudbih.gov.ba)) se može pronaći najviše različitih informacija o radu suda. Naprimjer, informacije o rasporedu suđenja su ažurne i detaljne. Također, pod kategorijom „dokumenti“ nalaze se revizorski izvještaji, tromjesečni izvještaji o kontroli budžeta, godišnji izvještaji Ureda registara, srednjoročni strateški planovi i sl. Međutim, potonje informacije bi mogle biti ažurnije. Isto vrijedi i za kategoriju „statistika“, gdje su predstavljene informacije o iskorištenosti sudnica po odjelima, pritvorskoj statistici i iskorištenosti sudnica prema broju dana za oktobar 2012. godine. Pod istom kategorijom nije moguć pristup informacijama o broju predmeta pred Odjelima I i II Krivičnog odjeljenja Suda BiH – zadnja provjera vršena na dan 13.03.2016. godine.

## Prilog

Naziv suda	Godišnji izvještaji (A) i ostale povezane informacije (B)	Informacije o završenim predmetima (2014.-2015.)	Mogućnost razgledanja spisa	Ažuriranost rubrike "Aktuelnosti"	Osoblje suda
1. Vrhovni sud Federacije BiH	(A): 2007; 2008; 2009; 2010. (B): članak o rezultatima rada za 2011.	NE <sup>6</sup>	Javnost i stranke	Djelimično <sup>7</sup>	DA
2. Kantonalni sud u Bihaću	(A): 2009; 2010; 2011. i 2013.	NE <sup>8</sup>	Stranke i punomoćnici	Djelimično <sup>9</sup>	DA
3. Kantonalni sud u Goraždu	(A): 2013; 2014. i 2015.	NE <sup>10</sup>	Javnosti i stranke	NE <sup>11</sup>	DA

<sup>6</sup> Uvidom u sadržaj na internet stranici Suda, utvrdili smo da je za 2014. i 2015. godinu objavljeno devet presuda (šest presuda tokom 2014. i 3 presude za 2015. godinu). Također, tokom 2014. godine Sud je osam predmeta vratio prvostepenom sudu, a jedan tokom 2015. Budući da Sud nije objavio godišnje izvještaje o radu za 2014. i 2015. godinu na svojoj zvaničnoj internet stranici, nismo mogli utvrditi stvarni broj riješenih predmeta za naznačene periode, a sigurno da je taj broj veći od broja objavljenih presuda (npr. tokom 2010. u radu je bilo ukupno 9 488 predmeta, a riješena su 5 772), te smo, zbog toga, označili da Sud djelimično objavljuje presude.

<sup>7</sup> Od 22.09.2011. do 28.03.2016. godine dostupna su 173 obavještenja (2011. – 8; 2012. – 29; 2013. – 23; 2014. – 77; 2015. – 30 i 2016. – 6). Prosječno gledajući, a uzimajući u obzir samo pune kalendarske godine (2012. – 2015.), Sud godišnje objavljuje 39.7 vijesti.

<sup>8</sup> Tokom 2014. godine na internet stranici Suda je objavljena samo jedna presuda, a njih osam tokom 2015. Poređenja radi, u izvještaju za 2013. godinu se navodi da je Sud u radu ukupno imao 6 821 predmet, a njih 4 425 je riješeno tokom godine.

<sup>9</sup> Od 28.06.2010. do 08.02.2016. godine objavljeno je ukupno 60 obavještenja. Tokom 2010. godine objavljeno je 8 obavještenja; 2011. godine 16; 2012. godine 7; 2013. godine 11; 2014. godine 7; 2015. godine 9; i za 2016. godinu 2 obavještenja. Ako se u izračunavanju prosjeka uzmu samo pune kalendarske godine, onda Sud godišnje objavljuje 10 vijesti.

<sup>10</sup> Na zvaničnoj internet stranici Suda nema niti jedno obavještenje koje se odnosi na presudu u nekom predmetu.

<sup>11</sup> Od 26.10.2011. do 13.01.2016. godine objavljeno je ukupno 11 vijesti. Za 2012. i 2013. godinu nema nikakvih saopštenja, dok je najviše objavljeno tokom 2015. (5).

## Prilog

Naziv suda	Godišnji izvještaji (A) i ostale povezane informacije (B)	Informacije o završenim predmetima (2014.-2015.)	Mogućnost razgledanja spisa	Ažuriranost rubrike "Aktuelnosti"	Osoblje suda
4. Kantonalni sud u Livnu	(A): Od 2004. do 2015.	NE <sup>12</sup>	Stranke i punomoćnici	Djelimično <sup>13</sup>	DA
5. Kantonalni sud u Mostaru	(B): Članak "Iz izvješća za 2012. godinu"; Dokumenti o programu rada suda i plan rješavanja starih predmeta za 2014. i raspored poslova za 2016.	NE <sup>14</sup>	Javnost i stranke	NE <sup>15</sup>	DA
6. Kantonalni sud u Novom Travniku	(A): 2009; 2010; 2011; 2012; 2013; 2014. i 2015. (B): polugodišnji izvještaj za 2010 i 2013, 6 i 9 mjeseci 2012 i 2014; program rada za 2011, 2013 i 2016.	NE <sup>16</sup>	Javnost i stranke	Djelimično <sup>17</sup>	DA

<sup>12</sup> U 2014. godini Sud nije objavio niti jednu vijest koja se odnosi na izricanje presuda u određenim predmetima. Tokom 2015. godine objavljene su samo dvije takve vijesti. Ako se uzme u obzir da je Sud tokom 2014. i 2015. godine ukupno riješio 3 238 predmeta po svim referatima, onda se jasno zaključuje da je broj objavljenih vijesti o izrečenim presudama u određenim predmetima potpuno zanemarljiv.

<sup>13</sup> Navedeni sud je djelomično ažuran u objavljivanju novosti i aktuelnosti. Od 05.01.2010. do 02.03.2016. godine objavljeno je ukupno 148 vijesti. Za 2012. godinu nema nikakvih objavljenih saopštenja. Prosječno gledajući, Sud objavljuje 23 vijesti na godišnjem nivou.

<sup>14</sup> Za posmatrani period Sud nije objavio niti jednu vijest vezanu za izricanje presuda u određenim predmetima.

<sup>15</sup> Kantonalni sud u Mostaru je od 13.09.2010. do 09.02.2016. godine objavio 150 vijesti (2010. – 7; 2011. – 76; 2012. – 46; 2013. – 17; 2014. – 1; 2015. – 2 i 2016. – 1). Iako Sud prosječno objavljuje 28 vijesti godišnje, tokom 2014. i 2015. godine objavljene su samo tri vijesti, a u prvom kvartalu 2016. samo jedna, smatra se da rubrika nije ažurna. U izračunavanju prosjeka u obzir su ulazile samo pune kalendarske godine.

<sup>16</sup> Prema godišnjim izvještajima za 2014. i 2015. godinu, Kantonalni sud u Novom Travniku je riješio ukupno 7 257 predmeta. Na zvaničnoj internet stranici objavljeno je ukupno 47 presuda (22 za 2014. i 25 za 2015. godinu).

<sup>17</sup> Od 04.01.2010. do 28.03.2016. godine Sud je objavio blizu 460 vijesti na svojoj internet stranici (2010. – 33; 2011. – 69; 2012. – 93; 2013. – 85; 2014. – 55; 2015. – 92 i 2016. – 32). Prosječno, Sud godišnje objavljuje 71.1 vijest (2010. – 2015.).

## Prilog

Naziv suda	Godišnji izvještaji (A) i ostale povezane informacije (B)	Informacije o završenim predmetima (2014.-2015.)	Mogućnost razgledanja spisa	Ažuriranost rubrike "Aktuelnosti"	Osoblje suda
7. Kantonalni sud u Odžaku	(A): 2007; 2008; 2009; 2010; 2013. i 2014. (B): članak da je Skupština kantona razmatrala informaciju o radu za 2012.;	NE <sup>18</sup>	Stranke i punomoćnici	NE <sup>19</sup>	DA
8. Kantonalni sud u Sarajevu		NE <sup>20</sup>	Stranke i punomoćnici	NE <sup>21</sup>	DA
9. Kantonalni sud u Širokom Brijegu	(A): Od 2009. do 2015.	NE <sup>22</sup>	Stranke i punomoćnici	Djelimično <sup>23</sup>	DA

<sup>18</sup> Prema godišnjem izvještaju za 2014. godinu Sud je riješio ukupno 608 predmeta. Na internet stranici je objavljena samo jedna nepravomoćna presuda za isti period. U 2015. godini na internet stranici su objavljene samo dvije nepravomoćne presude – ukupan broj riješenih predmeta za 2015. godinu nije poznat, jer na internet stranici Suda nije objavljen godišnji izvještaj o radu za tu godinu.

<sup>19</sup> Od 09.06.2010. do 29.09.2015. godine Sud je objavio ukupno 45 vijesti na svojoj internet stranici (2010. – 3; 2011. – 7; 2012. – 12; 2013. – 4; 2014. – 8; 2015. – 11). Za 2016. godinu nije objavljena niti jedna vijest. Prosječno gledajući, Sud objavljuje 8.4 vijesti na godišnjem nivou (u izračunavanju prosjeka su se uzimale samo pune kalendarske godine).

<sup>20</sup> Sud nema niti jednu objavlvenu vijest na internet stranici u vezi presuda u određenim predmetima.

<sup>21</sup> Od 11.12.2009. do 13.04.2015. godine Sud je objavio samo devet vijesti na svojoj zvaničnoj internet stranici (2009. – 2; 2010. – 1; 2011. – 1; 2012. – 1; 2013. – 1; 2014. – 0; 2015. – 3 i 2016. – 0).

<sup>22</sup> Prema godišnjim izvještajima za 2014. i 2015. godinu, Sud je ukupno riješio 2 766 predmeta za dvije godine. Ako se uzme u obzir da su na internet stranici Suda objavljene samo četiri vijesti iz izrečenim presudama u određenim predmetima (2014. – 2 i 2015. – 2), onda se taj broj može opravdano smatrati zanemarljivim.

<sup>23</sup> Od 10.06.2009. do 02.03.2016. godine objavljeno je ukupno 220 vijesti na zvaničnoj internet stranici Suda (2009. – 5; 2010. – 15; 2011. – 29; 2012. – 67; 2013. – 51; 2014. – 29; 2015. – 17 i 2016. – 7). U izračunavanju prosjeka u obzir su uzete pune kalendarske godine i prosjek iznosi 34.6 vijesti na godišnjem nivou.



## Prilog

Naziv suda	Godišnji izvještaji (A) i ostale povezane informacije (B)	Informacije o završenim predmetima (2014.-2015.)	Mogućnost razgledanja spisa	Ažuriranost rubrike "Aktuelnosti"	Osoblje suda
10. Kantonalni sud u Tuzli	(A): 2009. (B): saopštenje za javnost o radu za 2015.	NE <sup>24</sup>	Stranke i punomoćnici	Djelomično <sup>25</sup>	DA
11. Kantonalni sud u Zenici	(A): 2007; 2008; 2009; 2010; 2012; 2013; 2014; (B): izvještaj za 6 mjeseci 2013, 2014. i 2015. .	NE <sup>26</sup>	Javnost i stranke	Djelimično <sup>27</sup>	DA

<sup>24</sup> Prema saopštenju za javnost povodom godišnjeg rada Suda za 2015. godinu, Sud je riješio ukupno 6 017 predmeta. Taj broj nije poznat za 2014. godinu, jer na zvaničnoj internet stranici Suda nije objavljen izvještaj o radu. Sa druge strane, na internet stranici Suda nije objavljena nikakva vijest o presudama u određenim predmetima za 2014. godinu. Jedino su objavljene četiri vijesti u kojima se saopštava da su presude Kantonalnog suda u Tuzli potvrđene od strane Vrhovnog suda Federacije Bosne i Hercegovine. U 2015. godini su objavljene tek dvije vijesti o nepravomoćnim presudama na internet stranici Suda, a, osim toga, dostupna su i tri saopštenja o potvrđivanju presuda navedenog suda od strane Vrhovnog suda Federacije Bosne i Hercegovine. Prema tome, uzimajući u obzir broj riješenih predmeta u 2015. godini, broj objavljenih vijesti o presudama Suda na internet stranici možemo opravdano smatrati zanemarljivim.

<sup>25</sup> Od 26.08.2010. do 04.03.2016. godine objavljeno je ukupno 58 obavještenja (2010. – 13; 2011. – 1; 2012. – 9; 2013. – 3; 2014. – 2; 2015. – 20 i 2016. – 10). Iako navedeni sud prosječno objavljuje sedam vijesti na godišnjem nivou, uzimajući u obzir samo pune kalendarske godine, u prošloj godini i prvom kvartalu ove godine pružaju valjan indikator o intenziviranju ažurnosti Suda. Iz tog razloga može se reći da je kategorija "aktuelnosti" djelimično ažurna.

<sup>26</sup> Prema godišnjem izvještaju za 2014. godinu, Kantonalni sud u Zenici je riješio 5 687 predmeta. Za šest mjeseci 2015. godine, isti sud je riješio 2 936 predmeta. Na internet stranici moguće je pronaći 8 presuda za 2014. godinu. Od tog broja, četiri presude su u formi kratkih saopštenja za javnost, dok za ostale postoji detaljan uvid (potonje je moguće pronaći na zvaničnoj stranici Suda pod „odnosi s javnošću – saopćenja za javnost“; pretraživanje po godini: 2016; naziv obavijesti „Sudska praksa Kantonalnog suda u Zenici za 2014. godinu“). Za 2015. godinu postoji detaljan uvid u 17 presuda Kantonalnog suda u Zenici („odnosi s javnošću – saopćenja za javnost“; pretraživanje po godini: 2014; naziv obavijesti „Sudska praksa Kantonalnog suda u Zenici za 2015. godinu“).

<sup>27</sup> Od 18.02.2009. do 17.03.2016. godine objavljena je ukupno 81 obavijest (2009 – 1; 2010. – 2; 2011. – 1; 2012. – 0; 2013. – 23; 2014. – 23; 2015. – 26 i 2016. – 5). Prosječno gledajući, a uzimajući u obzir samo pune kalendarske godine (2009. – 2015.), Sud godišnje objavljuje 10.8 vijesti.

## Prilog

Naziv suda	Godišnji izvještaji (A) i ostale povezane informacije (B)	Informacije o završenim predmetima (2014.-2015.)	Mogućnost razgledanja spisa	Ažuriranost rubrike "Aktuelnosti"	Osoblje suda
12. Vrhovni sud Republike Srpske	(A): Od 2004. do 2015.	NE <sup>28</sup>	Stranke i punomoćnici	NE <sup>29</sup>	DA
13. Okružni sud u Banja Luci	(A): 2008; 2009; 2011; 2012. i 2013. (B): izvještaj za 6 i 9 mjeseci 2010; izvještaj za I polugodište 2012 i 2013; devetomjesečni izvještaj za 2013; i 2014.	NE <sup>30</sup>	Stranke i punomoćnici	NE <sup>31</sup>	DA

<sup>28</sup> U istraživanom periodu (2014. – 2015.), Sud je ukupno u radu imao 10 361 predmet. Od tog broja riješeno je ukupno 5 180 predmeta. Na zvaničnoj internet stranici Suda, među rubrikom „aktuelnosti“, nema niti jedna obavijest o presudi u određenom predmetu za posmatrani vremenski period. Međutim, u rubrici „sudska praksa“ moguće je pronaći određeni broj predmeta i presuda sa obrazloženjima za naznačeni period – u kontekstu krivičnog referata, moguće je pronaći devet presuda sa obrazloženjima za 2014. godinu, dok za 2015. nema niti jedna.

<sup>29</sup> Na zvaničnoj internet stranici Suda moguće je pronaći deset obavijesti za period 17.04.2015. – 02.03.2016. godine (2015. – 7; 2016. – 3). Nema dostupnih aktuelnosti i saopštenja za javnost za prethodne godine.

<sup>30</sup> Prema dostupnim podacima o radu Suda za devet mjeseci 2014. godine (podaci sa zasebne internet stranice Suda), u radu je bio ukupno 26 641 predmet po svim referatima. Ukupno su riješena 21 366 predmeta po svim referatima. Podaci o radu Suda nisu dostupni za 2015. godinu. Sa druge strane, na zvaničnoj internet stranici Suda preko Portala pravosuđa ([www.pravosudje.ba](http://www.pravosudje.ba)), nema obavještenja o presudama u sudskim predmetima za 2014. i 2015. godinu. Treba napomenuti da je Sud za 2010. i 2011. godinu objavio po jedno saopštenje za presude, a tokom 2012. njih sedam. Nema obavještenja o presudama ni za 2013. godinu.

<sup>31</sup> Od 02.09.2010. do 11.02.2015. godine dostupna su 24 obavještenja (2010. – 7; 2011. – 2; 2012. – 8; 2013. – 2; 2014. – 3; 2015. – 2). Uzimajući u obzir samo pune kalendarske godine (2011. – 2014.), Sud godišnje prosječno objavljuje 3.75 vijesti na internet stranici.

## Prilog

Naziv suda	Godišnji izvještaji (A) i ostale povezane informacije (B)	Informacije o završenim predmetima (2014.-2015.)	Mogućnost razgledanja spisa	Ažuriranost rubrike "Aktuelnosti"	Osoblje suda
14. Okružni sud u Bijeljini	(A): 2009. i 2014. (B): izvještaj za 6 i 9 mjeseci 2010.	NE <sup>32</sup>	Stranke i punomoćnici	NE <sup>33</sup>	DA
15. Okružni sud u Doboju	(A): Od 2004. do 2009. (B): Programi rada za 2015. i 2016.	NE <sup>34</sup>	Stranke i punomoćnici	Djelimično <sup>35</sup>	DA
16. Okružni sud u Istočnom Sarajevu	(A): 2015. (B): Polugodišnji izvještaj za 2009.	NE <sup>36</sup>	Stranke i punomoćnici <sup>37</sup>	Djelimično <sup>38</sup>	DA

<sup>32</sup> Prema godišnjem izvještaju o radu za 2014. godinu, Sud je ukupno riješio 2 606 predmeta. Podaci o radu Suda za 2015. godinu nisu dostupni na zvaničnoj internet stranici. Na istoj stranici dostupna je samo jedna obavijest o izrečenoj presudi za 2014. godinu. Takvih obavještenja nema za 2015. godinu. Međutim, Sud je, prije istraživanja perioda, bio nešto ažurniji. Tako, naprimjer, za 2011. godinu postoje dva obavještenja o presudama. Postoje tri obavještenja za 2012. godinu od kojih se jedno odnosi na potvrđivanje presude od strane Vrhovnog suda Republike Srpske. Za 2013. godinu postoji jedno obavještenje o presudi Okružnog suda u Bijeljini.

<sup>33</sup> Od 06.09.2010. do 07.12.2015. godine, na zvaničnoj internet stranici Suda objavljeno je ukupno 29 vijesti (2010.– 3; 2011.– 11; 2012.– 7; 2013.– 2; 2014.– 2 i 2015.– 4). Uzimajući u obzir pune kalendarske godine (2011. – 2015.), Sud objavljuje prosječno 5.2 obavijesti godišnje.

<sup>34</sup> Za posmatrani period 2014. – 2015. godina, na zvaničnoj internet stranici Suda moguće je pronaći ukupno 50 presuda (2014. – 27 i 2015. – 23).

<sup>35</sup> Od 28.08.2010. do 30.03.2016. godine objavljeno je ukupno 258 vijesti (2010. – 43; 2011. – 49; 2012. – 39; 2013. – 34; 2014. – 41; 2015. – 37; 2016. – 15). Prosječno gledajući (2011. – 2015.), Sud objavljuje 40 vijesti godišnje.

<sup>36</sup> Prema godišnjem izvještaju o radu Suda za 2015. godinu, ukupan broj predmeta u radu je iznosio 2009. Od tog broja, riješeno je ukupno 1749 predmeta. Podaci o 2014. godini nisu dostupni na zvaničnoj stranici Suda. U istraživanom periodu objavljeno je ukupno devet presuda (2014. – 4 i 2015. – 5).

<sup>37</sup> Uključujući i „ostale osobe koje imaju opravdan interes“.

<sup>38</sup> Od 15.04.2009. do 23.03.2016. godine objavljeno je ukupno 138 vijesti (2009. – 4; 2010. – 19; 2011. – 30; 2012. – 18; 2013. – 26; 2014. – 19; 2015. – 16 i 2016. – 6). Godišnji prosjek objavljivanja vijesti iznosi 21.3 (2010. – 2015.).

## Prilog

Naziv suda	Godišnji izvještaji (A) i ostale povezane informacije (B)	Informacije o završenim predmetima (2014.-2015.)	Mogućnost razgledanja spisa	Ažuriranost rubrike "Aktuelnosti"	Osoblje suda
17. Okružni sud u Trebinju	(A): Od 2005. do 2015.	NE <sup>39</sup>	Stranke i punomoćnici	Djelimično <sup>40</sup>	DA
18. Osnovni sud Brčko Distrikta BiH	(B): Protok predmeta za 2009.	NE <sup>41</sup>	Stranke i punomoćnici <sup>42</sup>	NE <sup>43</sup>	DA
19. Apelacioni sud Brčko Distrikta BiH	(B): Izvještaji o protoku predmeta od 2013. do 2015; program rada, raspored poslova i sastav vijeća za 2016.	NE <sup>44</sup>	Stranke i punomoćnici	NE <sup>45</sup>	DA

<sup>39</sup> Prema godišnjim izvještajima o radu Suda za 2014. i 2015. godinu, riješena su ukupno 2673 predmeta (2014. – 1318 i 2015. – 1355). Za isti period, na stranici Suda objavljeno je šest vijesti o presudama u određenim predmetima (2014. – 1 i 2015. – 5).

<sup>40</sup> Od 20.09.2010. do 12.02.2016. godine objavljena su ukupno 73 saopštenja (2010. – 3; 2011. – 25; 2012. – 7; 2013. – 4; 2014. – 9; 2015. – 23 i 2016. – 2). Prosječno, Sud objavljuje 13.6 vijesti na godišnjem nivou (2011. – 2015.).

<sup>41</sup> Za period 2014. – 2015. godina, objavljena je samo jedna presuda (2015.) na zvaničnoj internet stranici Osnovnog suda u Brčko Distriktu BiH.

<sup>42</sup> Uključujući i „stranke koje imaju jasan pravni interes“.

<sup>43</sup> Od 24.09.2010. do 04.02.2016. godine, objavljeno je ukupno sedam vijesti (2010. – 1; 2011. – 1; 2015. – 4 i 2016. – 1).

<sup>44</sup> Prema podacima iz izvještaja o protoku predmeta za 2014. i 2015. godinu, Sud je ukupno riješio 4005 predmeta (2014. – 2203 i 2015. – 1802). Nema objavljenih saopštenja o presudama za 2014. godinu, dok je u 2015. godini objavljena samo jedna presuda na zvaničnoj internet stranici.

<sup>45</sup> Od 10.11.2010. do 09.02.2016. godine objavljeno je ukupno devet vijesti (2010. – 1; 2011. – 0; 2012. – 1; 2013. – 0; 2014. – 1; 2015. – 3 i 2016. – 3).

*Centar za sigurnosne studije  
Centre for Security Studies*

*Branilaca Sarajeva 13/I, 71 000  
Sarajevo*

*Tel: +387 33 262 455 / 262 456*

*Fax: +387 33 223 250*

*e-mail: [info@css.ba](mailto:info@css.ba)*

*[www.css.ba](http://www.css.ba)*